



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Parnassus Catholicus Sive Succincta Quorundam inter
Religiones modernas discrepantium Dogmatum Poëtica
enodatio**

Mertz, Johann Wilhelm

Viennae Austriae, 1679

10. De Votis.

urn:nbn:de:hbz:466:1-9862

QUÆSTIO DECIMA. DE VOTIS.

JAm quorsum Votum? quorsum servare, vel ipsa
Quod natura negat, velle vovere DEO?

Sentent. Ac-
Cathol. con-
tra Votum.

An non conjugium cunctis Deus ipse sacravit?

Cur Præses tollit, quod Deus instituit?

Crescite, non dixit, sterilescite, nubere jussit

Genes. 3.
1. Cor. 7.
Matth. 8.
Luc. 4.

Non urit Paulus, nupsit & ipse Petrus,

An non, ut generent homines, generantur & illi?

Cur homini vitam, quam dedit ipse, negat?

Si Deus esse hominem solum voluisse Adamum,

Non ipsi sociam, de osse creasset Ewam.

Ergo hanc cum vitam dederit tibi providus alter,

Tu quoque da vitam, tu quoque fac hominem.

Vota quid incusas? si sunt reddenda, jubente,

Pro Votis.

Quomodo non etiam sunt facienda DEO?

An non expressè dicit Scriptura, vovete?

Psal. 115.

Et quæ vovistis, reddite vota DEO?

Si quid vovisti, ne reddere stulte moreris,

Eccl. 5.

En quoque reddendi displicet ipsa mora.

Et quis Virgineis carnales conferat actus?

Eccl. 26.

Quis castis nuptas, dixerit esse pares?

Curat Virgo DEUM, sed curat nupta maritum,

1. Cor. 7.

Diligit illa DEUM, diligit ista virum.

Gignimur in mundo, non ut gignamus in ipso:

Vivat ut in cælo, nascitur omnis homo.

Is quoque qui dixit, quod præstat nubere, quam uri,

Vult omnes homines esse sui similes.

H

Nec

- 2. Cor. 12.* Nec cùm urebatnr, stimulos uxore repressit,
 Sed flagris, precibus, continuâque fame.
 Sic fecit Paulus, sic Petrus, sic Benedictus,
 Sic omnes Patres, Virgineusque Chorus.
 Nec mihi tu Petrum obijcias, quasi duxerit ullam,
 Postquam jam Christi sorte Minister erat:
 Cùm duxit, piscator erat Bariona vocatus,
 Nondum Petrus erat, nec Petra dictus erat.
 Ante Ministerium Christi fuit ille maritus,
 Post verò, missâ conjugे, castus erat.
 Quin ipse ac omnes alij, quas ante habuerunt,
 Post, dimiserunt sponte Ministerium.
Mattb. 19. En nos, Petrus ait, dimisimus omnia: Patres,
 Matres, Uxores, Christe quid ergò dabis?
 Nonne thronum summi promittit & æthera cæli?
 Utrum ergò uxorem suadeat ille? vides.
 Uxorem, dixit, quicunque reliquerit ipsam,
 Non is qui dicit, postmodò salvus erit.
Apoc. 14. Hinc Agnum cæli, casti, innuptique sequuntur,
 Non nupti aut juncti fœdere conjugij.
 Et si tám sanctus thorus est, tamque immaculatus,
 (Ut quidam spretâ Virginitate volunt)
 Quomodò tám sanctus tám purus & immaculatus
 Agnus (qui tollit crimina nostra) DEI:
 Noluit ex nuptâ, sed castâ ex Virgine nasci?
 Cur sprevit thalamum? conjugijque thorum?
 An qualis sponsus, talis quoque sponsa placebit?
 Et castus, castos plùs volet esse viros?
 Jam quid mercedis capiat sine conjugé cœlebs,
 Expressit Christus, quandò rogatus ait:

Sunt

Sunt qui castrârunt se regni propter amorem
Cœlorum: hinc castis astra patere vides.
Non tamen idcirco thalamus damnatur honestus,
Sed si nupta placet, plūs pia virgo placet.
Quin etiam natura docet præcellere castos,
Et multos quondam continuisse liquet.
Hinc nuptis quondam Vestalis virgo præibat,
Atque adeò in cœlo, continet omnis homo.
Quin coelestis homo terrestris, & Angelus ille est,
Qui vitam in mundo duxerit absque thoro.
Antiquis ergo ac illis tantummodo dictum est,
Crescite, qui possunt nubere, quique volunt.
Ergo qui nubit malè non facit, inquit is idem
Paulus, sed qui non nubit, agit melius.
Sicut, qui vinum bibit, is male non agit; at qui
Non bilit, is longè rectius & melius.
Et quia quæ Domini sunt, querere quisque tenetur
Præsbyter, hinc opus est castus ut ipse fiet.
Quod si quis nequeat, vel nolit vivere cœlebs,
Nubat, non voveat; nam data vota ligant.
Nullus, quod voveas jubet, at si voveris ultrò,
Ut serves votum, Christus & ipse jubet.
Quod si quis tandem doceat fortasse Minister,
Quod cœlebs nullus vivere possit homo.
Ipsum se prodit, quod nunquam vixerit antè
Conjugium cœlebs, mœchus is ergo fuit.
Et sua quam duxit mulier pro conjugi, quæro,
Anteà quam duxit, castanè continuist?
Si castè vixit: cur nullum vivere posse
Clamat? si potuit, quomodo nemo potest?

*Mattb. 22.
Marc. 6.
Luc. 20.*

1. Cor. 7.

Aut

Aut ergò ipsius falsa est doctrina, vel ipse
 Mœchus & ipsius mœcha quoqué uxor erit.
 Denique si verum est, quod nemo vivere possit
 Castè, nulla ergò casta fuit, vel erit.
 Antè ergò Uxorem poteras si vivere castè,
 Quomodo post illam, vivere non poteris?
 Tu Christi servus semper meliora sequaris,
 Si te non castè vivere posse putas:
 Numen adi, castaque preces, ad, dirige, Christum,
 2. Cor. 12. Síc Paulus fecit, sic quoque tu facies.
 Dat, quodcunque petunt homines super æthera Christus,
 Quod natura negat, gratia suppeditat.

QUÆSTIO UNDECIMA. DE PAPATU.

*Sententia Ac-
catholicorum
contra Pa-
pam.*

DEniq; quod monstrum Papa est? quis condidit illum?
 Quis dedit, ut faciat, quicquid ubique placet?
 Quis dedit, ut leges figat? diademata tollat?
 Rursùs & imponat? séque Deum statuat?
 Quis dedit ut regnet? thesauros congreget? orbem
 Territet? Imperium transferat? arma gerat?
 Hæreticos dicat, quicunque furoribus ejus
 Obsistunt? laqueo strangulet? igne cremet?
 Quis dedit ut Romam teneat? Cathedramque gubernet?
 Cur simùl Imperio vim facit, atque polo?
 Quis claves Regni cælorum contulit ipsis?
 Quis dedit ut reseret, rursùs & astra seret?
 An plus fortè potest, quam alij quicunque Ministri?
 An cupid ut stygius Lucifer esse Deus?

Quis